



Այսօր՝ փետրվարի 27-ին, ժամը 13:00-ին Բյուրեղավան համայնքի Բյուրեղավան բնակավայրի մշակույթի տանը տեղի ունեցան հանրային լսումներ: Լսումները վարում էր համայնքի ղեկավարի տեղակալ Միշա Եղիազարյանը: Ներկա էին համայնքապետարանի աշխատակիցներ, ներկայացուցիչներ համայնքի ՀՈԱԿ-ներից, ավագանու անդամներ և ակտիվ բնակիչներ: Համայնքապետարանի աշխատակազմի ֆինանսատնտեսագիտական, եկամուտների հաշվառման և հավաքագրման, ծրագրերի կազմման և համակարգման բաժնի պետ Լիդիա Պողոսյանը մանրամասն ներկայացրեց Բյուրեղավան համայնքի 2019 թվականի բյուջեի կատարման տարեկան հաշվետվությունը: 2019 թվականի Բյուրեղավան համայնքի եկամուտները կազմել են 344 040 0 հազար դրամ, իսկ ծախսերը կազմել են 353 895 9 հազար դրամ: Այնուհետև, համայնքապետարանի աշխատակազմի գլխավոր մասնագետ, զարգացման պատասխանատու Սարգիս Ղազարյանը ներկայացրեց 2019 թվականի համայնքի հնգամյա զարգացման ծրագրի և տարեկան աշխատանքային պլանի իրականացման վերաբերյալ տարեկան հաշվետվությունները, ինչպես նաև Բյուրեղավան համայնքի 2020 թվականի տնտեսական և սոցիալական ենթակառուցվածքների զարգացմանն ուղղված սուբվենցիոն ծրագրերը՝ «Ներհամայնքային ճանապարհների բարեկարգում, հիմնանորոգում», «Նուռնուս բնակավայրում համայնքային կենտրոնի կառուցում», «Զրաբեր բնակավայրի խմելու ջրի բարձր ճնշման ջրագծի և ներքին ցանցի կառուցում», ««Անդրանիկ Պետրոսյանի անվան Բյուրեղավանի քաղաքային պոլիկլինիկա» ՓԲԸ վարչական շենքի և բակի հիմնանորոգման աշխատանքներ»: Փետրվարի 28-ին հանրային լսումներ տեղի կունենան Զրաբեր և Նուռնուս բնակավայրերում:

01.03.20